

ms  
28/06/05

# টোনাটিং

ব্রজেন্দ্রকুমার সিংহ

এবারা তলেদে দেই



ইন্দ্র দাশগুপ্ত | ছাত্র

ইন্দ্র দাশগুপ্ত

টোনাটিং



# টোনাটিং

ব্রজেন্দ্রকুমার সিংহ

প্রতিশ্রুতি

TOUNATING  
NONESENSE RHYMES  
IN BISHUPRIYA MANIPURI  
BY BROJENDRA KUMAR SINHA  
© SUKHADA SINHA

পয়লা প্রকাশ : বিষ্ণু সংক্ৰান্তি ১৪১১  
এপ্রিল ১৪, ২০০৫

প্রকাশক  
সুখদা সিংহ

প্রতিষ্ঠান  
আশ্রম রোড, হাইলাকান্দি - ৭৮৮১৫১  
আসাম  
ভারত।

মলাটহান  
লেখক

ছাপানি  
শিখা ভট্টাচার্য  
সাহিত্য প্রিন্টার্স  
কলেজ রোড, হাইলাকান্দি - ৭৮৮১৫১  
আসাম, ভারত

রূপা দশহান

মণিশ্রী, মণিরূপা বার মণিপ্রভারে

বাবা

## ব্রজেন্দ্রকুমার সিংহর লেরিক

চক্রবৃদ্ধি (নাটক)  
লেহাও ফুলগরে  
এলার খুৎতল  
ধ্রুবপদ  
মেরাক সেরাক  
কণ্ঠগিরো (নাটক)  
পুংলল  
মেইকেই (নাটক)  
বিরহী যক্ষর এলাহান  
জিনজিনি  
পৌরেই (সম্পাদিত)  
মেয়েক মেঠেল ১ম ভাগ (সম্পাদিত)  
রস বিলাস  
চিকৎলেই  
সিকাডেইনি  
বিষ্ণুপ্রিয়া মণিপুরী ছন্দ পরিচয়  
আহির পানির পথগ  
ফিরাল  
জার্নাল

## লেখকর আর আর লেরিক

রুবাইয়ৎ-ই-ওমর খৈয়াম  
ডিগল আতহানল মোরে  
মিকুপর চেরি ফুল  
হপনর বাবুয়ানি  
কিমে অয়া আছৎ ইকাইতাপি  
লক্ষ্মী গিথানক (নাটক)  
ভিক্ষা দেনে এরে আহিগিতৌ  
কুরৌ আহান রবীন্দ্রনাথ  
জোনাকহান বার কুসুমলেই  
দুঃখ মাচুর হমাজক  
রাজপ্রশ্ন (নাটিকা)  
কালিদাসর মেঘদূত

দুহান আহান কবিতা আগেদে নিকুলেছে ঔতার লগে কতহান  
নুয়াতা যৌকরিয়া লেরিক এহান। আগেকার ঔতা সামান্য পরিবর্তন বার  
শুদ্ধ করানি অইল।

এহানর প্রুফ চেইলতাই কল্যাণীয় শ্রীমান সন্তোষ সান্তনই।  
লেরিকহান অয়া নিকুলানির আগে জ্যোতির্ময় মণিদীপাই আকথুরুম চা  
দেছিল।

লেখিকা শ্রীমতী শিখা ভট্টাচার্যই লেরিকহান লেহে হিনপেইরি  
মোর নানান পরিবর্তন য়াকরতেগা। তেইরে কৃতজ্ঞতা জানেইল ভাষা  
নেই।

দিলীপ কুমার সিংহ থাইলইছতে দাদার লেরিকহান বুলিয়া নিয়াম  
হারৌ অইলইছ।

বার্তন	৭
কৃষ্ণ	৮
শৌনাটিং	৯
জলা	১০
এই	১০
কুমারধন	১১
গণিত	১২
হইমা	১২
হারপেয়া থই	১৩
মুক্তা	১৩
রামায়ণ	১৪
কেশগ	১৪
ভূগোল	১৫
পড়ুয়ার পৌ	১৬
এলা	১৬
নারৌ খানা	১৭
খাইমুনি	১৮
চৌধুরি	১৮
পদ্য	১৯
দৌ	২০
য়ারির লগর পরি	২১
তেরা কাকচিং	২২
তেনুয়ার কৌলি	২২
দ্বি আক চুটি	২৩
চিত্তা	২৭
রাস	২৭
হনামানু	২৮
টাকগ	২৮



## বার্তন

এপেই আহো শৌগি হাবি  
টেকাগৎ নৌ বেইতাঙাই।  
টৌনাটিঙর মুকসি বাহের,  
কাদানিতে নেইতা নাই॥  
খৌ বুজিয়া খেলা আছে,  
কলো বুজে এলাহান।  
চেইনে আয়া বুলে বুলে  
হপনহানির মেলাহান॥  
ধমক মেইসা সুপ করে নেই  
আমার এরে এপেইতে।  
কেমচা ধরের গাছে লতে  
বপকো যেপেই হেপেইতে॥  
এপেই বৌয়ে ডাকর বারি,  
মিঙালহানাং নাছাক।  
তোমার সালে হাক লপুকে  
আছে বাসা বাসাক॥  
এপেই আধার কুরাঙো নেই,  
নেই সুপক ডরপানি।  
লালতা আছে পথে ঘাটে,  
বিসারতে নেই চুমহানি॥  
হিং পিদেছি সিঙ মানু নেই,  
হাবি বুলা চুলাতা।  
গালেইতারা বুজন নেই নাই,  
হাবি কনাক, খুলাতা॥  
হারৌহানাং হাতুরোনে  
চড়ো মনর ঘরাগৎ।  
মুকাদেছি আমার দেশে  
উল্টাগদে যানার পথ॥

## কুঞ্জ

কুঞ্জর ঘরে আছে এমাটিক জঞ্জাল।  
 ডেই দুগ আয়া আজি করতারা গঞ্জাল॥  
 মাঞ্জিয়ে মাতেরতা বেলা দিয়া যাগানে।  
 নাম লয়া মাধুকরী করে করে খাগানে॥  
 পাঞ্জি মি চেইলুতা খেলহান এহানেই।  
 অইতই হাবি হবা করতেই যেহানেই॥  
 মেঞ্জং নিকুলেছে কিহানতে করানি।  
 গরে থাইলেতে ইমে জিংতাং মরানি॥  
 তাঞ্জাগ চেয়া আজি ভেক লছু বুলনে।  
 কিয়া লাজপারতা তি থতাহান খুলনে॥  
 গঞ্জর মন্দিরে কুঞ্জই আছেগা।  
 খঞ্জনী খুড়িরে তা ঔপেই পাছেগা॥  
 চারিবেদে আছি বয়া কানা বার খঞ্জ।  
 সমালানি হিনছেক ঔতার জঞ্জ॥  
 ইঞ্জাও বুড়া আছে দৌগরে রাহিয়া।  
 সাংসাपा নেয়ছেতা মেঞ্জর নাহিয়া॥  
 তিনজরা পথগং বছি যেতা ভক্ত।  
 মাৎতারা কুঞ্জর মনহান শক্ত॥  
 খেঞ্জঙে মাতেরতা দুয়াহান নাচেয়ো।  
 কাদতই ঔহান খানি করে বাসেয়ো॥  
 পাঞ্জা খেলেয়া আছি শৌ দুগ ঔপেই।  
 কিয়া থাঙ লিটকেয়া আহিতারা বৌনেই॥  
 থায়া থায়া কুঞ্জই দেরতাক লউগ।  
 তঞ্জাও আন মালা আটানির খউগ॥  
 চাতা স্না গুঞ্জাগ আছেতা না নাছেতা।  
 নিরালর নামসাগ হবা অয়া আছেতা ?॥

## শৌ নাটিং

টৌ নাটিঙর পুতক আগ আছিলতা নাই শৌনাটিং  
উগর টেংঠা ঔতা খানি তোমার লগে মি বাটিং॥  
তার য়ারিহান হুনে গিরক নুয়ারা অর বালাগৌ।  
মারূপ হাবি অছি তারতা তিরা জ়ারর কালা দৌ॥  
অজা নেইকরেছে উগই বিদু তিতু আগরে।  
ডুলবি আগ থরতা নাইক মুরর গজে কাকরে॥  
শাংহান চেইতে টিকির সম্পাই আহি দ্বিগি লিকলগি।  
কিতা মাংতু! আঙুলিগি আত আকেইহান ডিগলগি॥  
মুরগ তলে দিয়া উগই গুয়ার গাছে কারগা নাই।  
রাতি এহান মইচ আগরে এলা হুয়ারগা নাই ॥  
হিয়াল দুগ, তিনগ মাকু হরপ আগ দরগ।  
য়ককরিয়া খাল করেছে তারে তাতে বরগ॥  
উতার গজে সেকপি আগ, তিন চারিগ কওয়া নাই।  
ছেয়ার লগে মধুর দিয়া থছে খওয়া খওয়া নাই॥  
হাদিৎ দেৱতা খুয়া খানি থৌ ফুটিল তিঙেয়া।  
কলো আগৎ বেলিটিকর রইদ খানি থর জিঙেয়া॥  
হুন্না ফুতি রইদে দেৱগা, তিঙা উপুৎ বরারগ।  
-‘লেইসি কৰৌৱিতা হাৱপেই মি নাগই নাই পৱাৱগ॥’  
বাতে বগা বুললে উগই বরগা বাতর গজে তা।  
এতা চেয়া মালক ঔগর মনহান হারৌ অছেতা॥  
-‘লামর দৌয়ে বর দেছিগ, হেতে মেতে নাগইগ।  
মোর শৌগরে লাল বুলিয়া পৱথা নাৱবাই আগইক॥  
যেহান মনার উহান কৱক, তকপা আগ ধরকগা।  
মনেইলে তা বিলে গিয়া আকখুলাই রাস কৱকগা॥’  
টৌনাটিঙে খালকরিয়া মাতেৱ – ‘এতা হাবি চুম।  
মোর পুতকে এলা দিলে বাগেৱ মানুৱ রাতিৱ ঘুম  
চর নাহিতাই ঔগদেতে নাউ খালকৱতাৱা সুপ।  
চাউৱিতা মি গাঙ এহানৱ মানু এতা নাগই কুপ॥’  
গাঙ ঘৱেদে মাততাৱাতা — হুনা গিরক হমা দিক।  
এগদে আৱ নাহিছ এনে ঠইগি খানি অকনে চিক॥

## জলা

ধলা বুড়াই হাতগ কলা থছে জলা করিয়া।  
হরি বলার দিনে উগি আটেরতা নাই ধরিয়া॥  
তলা আহান লুরি লছে কিগই জানে কিতারকা॥  
খলা আহান মুড়ি আকদিন আনেছিলু মি তারকা।  
মধুর ডলা গলা গলা লারৌ হংকরেছিলতা।  
কিয়াথাংক এতা করের নাউ ফংকরেছিলতা॥  
টলা আগই রাতি আয়া খাদিলগা চরেদে।  
ধলা বুড়াই কাদল বয়া কালা চিংখেইর পরেদে॥

## এই

খানার এই মি বিলাউরিতা হারপেয়া থ মাগানা।  
মনেইলে আই খেয়া যাগা, হ্নরতা তি পাকানা॥  
ঠুমতা আছে, চহা, কহা, বালতা আছে মোরাং নাই।  
যেতা মনার উতা পেইতেই মি মানু এগরাং নাই॥  
নুনটুকাতা আছে ঔতা চমৎকারতা, আচানক।  
আইনে খেয়া হ্নাশৌগ তোরতা খানি ঠাচা অক॥  
ডিগালাতা, গুলডুপাতা আর কততা আছেগ।  
মনেইবেতা দিতৌ মিতে চেয়া বাছে বাছে ক॥  
হাপেই আহান মাংলে দিতৌ, গজে আরাক খানিয়ৌ॥  
খেইলে তিতে হ্ন্যাংহানে বেলতেই আহির পানিয়ৌ।  
নাঙ হ্নানি মনারতা তি, চানা মনার দূরেইৎত।  
কিতা করতে, মাতুরি নাই, নিয়াম হ্ন্যাং, হে সেইৎত॥  
হাইদে মাতিং নাঙহানি মি, — বুকুর, চাপড়, উতার নাঙ।  
কানাহা, কট — কিয়াকাতে লাথলেদে লাগর খাঙ॥  
তিংখুল আগ, সিমটাহানি — আই কাদাদে দেহা দিং,  
খেইবেতাই তি দৌ দেখতেই হারপাছংতা বুদ্ধি সিং॥

## কুমারধন

কুমারধনে পুমার গাছে বয়া চারতা গাওনহান।  
টোলা আগ মুরে দেছে, ছয় মা পিছে হাওনহান॥  
মাতের মিতে তোমার সাদে ঠংকা আলা নাগইক।  
মিংটা আহান লালতে মোরাং নাপেইতারাই আগইক॥  
বরিষারমা গুলা আইলে করতারাইতা কিহান থাঙ।  
চেইনে মিতে গাছে কায়া অছু কতি ওয়াইসাঙ॥  
কামদেব মরিল রাতি ঘুমজিতেগা ফামরমা।  
ওহানে মি না ঘুমজৌরি, হজাক থাউরি মামরমা॥  
বাবাইসেনা মরিলতাতে জিপেইতেগা আহিগ।  
এতা কিতা দেহেছু মি আপদ বিপদ মাহিক॥  
আহি ঘগি না জিপাউরি চাউরি মিতে কুপকরে।  
মরে পড়লে গাছজারেংত পড়ে পড়তৌ ডুপকরে॥  
সৌকরার মা কাছা আহান লগে থউরি জাররকা।  
ঠেকার দিনে হিন নাপেইমতা কামে লাগের বাররকা॥  
চৌল আক মল থনার সালে দেইনে মোরে খৌ আগ।  
বানা পেইলে গাছ এজারে কাকরে দেই নৌ আগ॥  
নৌ বানা মি হিকিং করে বুড়া কালে সেংকরে।  
দাদা গাছি, হুনা গাছি মাতৌরিতা মেং করে॥  
মলপাক আগ, মহরিহান, লগে দেইনে মল আগ।  
ঠেকাং পড়লে হাতুরিমতা দেইনে মোরে খল আগ॥  
থিংকরোনে বৌবরন দের হাক এহানর দুয়ারহান।  
কামে লাগক, হারপেয়া থই এতা কথার ছয়ারহান॥  
কতি তপ্তা অরতা লপুক বৈশাখ জেঠমার ফাপহানাং।  
হাকে টাঙো ডাঙর মাঠা না মরবাইতা তাপহানাং॥  
আহো আহো বুদ্ধি লইনে জিংতা অনির পথ করো।  
মোরাং আছে লৌসিং এহান খানিক করে কংকরো॥  
তুমি অছো নাগইতালো, ফাগি দিয়া লাংলাং।  
মোর কথাহান লইনে তুমি না মরিয়ো বাহুরাং॥



## গণিত

হাতগ মাকু গাছর ডেঙে তিনগ মেকুর তলেদে।  
মাততা গিরক কইগ ডেহি তলেগ গাছির কলেদে॥  
লেইফেং তি নাদি হুনা মাতনে মোরাং খানিকক।  
আমিতে হাই নাজানিতা, তোরাংত দে জানিকক।  
এহানৌ তি নুয়ারলে থাং! হবা করে খালকরিছ।  
যোগ করিয়া ভাগ করিয়া হারপানিহান তালকরিছ॥  
মাকু উগি মেকুরগিল পুরণ করলে পেইতে নাই।  
নাইলে উতা সমস্তরমা নিয়া বার চেইতে নাই॥  
পারলে নেগা দশমিকে, সুদকখালৌ করিছনে।  
মাকুগি এরা দিয়া মেকুরগিরে ধরিছ নে॥  
মানসাকৌ চানা পারর মেকুরগিরে বাধিয়া।  
ঐকিকে কর মাকুগিরে উদুর তিনগ দাদিয়া॥  
সরল গরল যেতা পারর হাবিতালৌ চানা থক।  
ভগ্নাংশং চানা পারর, অনুপাতল পানা থক॥  
নুয়ারলে চা লাজর কথা, আহিতাইতা গাঙ ঘরে।  
অজাই বার কানাহাহান ফুটা দিতই জুং করে॥  
কি দশারমা পড়লে গিরক মিতে কিতা করতু মাত।  
কুরাং হমেইতেইগা আজি লুকাগানে বনহানাং॥

## হইমা

বাঘ আগ মি দেখলু উগর পাখ আছিলতা দুহান নাই।  
কওয়া আগ দেখলু উগর ডিগল অছিল জুহান নাই॥  
হরপ আগর হিং আছিলতা আচানকহান নাগইতা।  
মাছ আগরতা নখগি আছিল, অটল আকখুলাগই তা॥  
হিয়াল আগর বাকল আছিল, হইমা কিহান মাৎতু মি।  
এতা চেয়া বিবুলাগ, আহিতু না কাদতু মি॥

## হারপেয়া থই

বাঘর শৌরে মাঘর রাতি সিনচু দিলে কামাড়তাই।  
ইরেইর দিনে ইরাইরি অনা গমনেই আমারতাই ॥  
ভুতর জিপুং ঘুমে থাইলে কেতুকেয়া লারেইবে।  
ধনমাচিয়ে এলা দিলে সিঙেছক ডাক বারেইবে ॥  
কালো দৌয়ে হজক পিলে নাযেয়োগা খঙেদে।  
বেলিটিকে বিবিয়েইলে না নাছিয় ফঙেদে ॥  
সাকলসেলে আকসিয়েইলে বাত টুপিহান চৌলি অর।  
হপনেদে চম নাবুজিছ—লাহ্লাদে কৌলি অর ॥  
সারিঙ আরিঙ কাদলে চানা বাতর বারার আহিল।  
উসেই আগ গুরে দিয় চুচর ছালি মাহিল ॥  
হারপেয়া থ, নাইলে পিছে আনাংসাছে নাঙইতাও।  
বুজনরাং আংকরিছগা হ্নলে তিতে খাঙইতাও।

## মুক্তা

মুক্তা তোরে মাতিং মিতে পড়িছ এনে বুজা।  
দুহনিগৎ ছেয়া এগ বরেয়া তি দুকতা ॥  
সুক গাহালি আনগা বেনাই, আনগা নাইলে খলগ।  
বেংকি আগ আনগা যাগা, না মালইনে সলগ ॥  
মিঙালহানাং লগে থায়া রাতি কুরাং যারগা।  
এমাটিকো মাতুরি থাং উতাউ তারাং নারগা ॥  
দিনহান অইলে, যাকগা বুলাং আধারে তা থাকনে।  
বুঝাউরিতা—কথা এহান সয়নিতে নাকনে ॥  
আকতুপ মি করতৌ আজি, নাগণেরতা এমাটিক।  
মাতৌরিহান নাকরিয়া জানারতা নাই মোরে তিক ॥  
মারে বেলেইং তারে মিতে, মাতলু এহান কর তি।  
কাম বেলেয়া ছেয়া এগ আজিকারগাই ধর তি ॥

## রামায়ণ

নিককা নিককা লেরিক হুতে তিতে গিরক কাদরগ।  
রাবণ রাজার কামড় খেয়া মরেছে কোন বাদরগ॥  
মাংতা মোরে — উগর নাঙ তি ; রামায়ণে আছে তা?।  
লালফামে তা লুকাছিলগা—কাছিল মাত কুন গাছে তা?॥  
হারপেয়া থ— আক কামড়ে দাত বিদেছিল দশ থতার।  
মরণ ফাঙইলাতা দুঃখই শৌজিপুতৌ দশগ তার॥  
ঔগরে রাম তুলসী পাতার বরন দিলা তালুরমা।  
কাটালুরি তিলকরিয়া আনল আগই সালুরমা॥  
ঔতা জাঙে বাধে দিলা ছচুরি না কাইবতা।  
ঠই ঔগ দূরেই বায়া কাদা বারাং থাইবতা॥  
জিংতা অয়া মাতের উগই—ইমে ফাগি করলুতা।  
বুদ্ধি লৌসিং নেইগ থাঙ মি আককামড়ে মরলুতা॥  
তোমার সালে চাতা মোরে মানুয়ে লাজ দিতাই নাই।  
ঘরে যিংগা এববাকারগাই শৌ জিপুতে কিতাই নাই॥

## কেঙগ

কেঙ শৌ আগ গাছর ডেঙে জিংতা চেংগ খারগাতা।  
ঠেং চারিহান লাম করিয়া রেঙ রেঙেয়া চারগাতা॥  
সেঙ ফুতি তা নাপিদের নাই, দ্বি বেঙ ডিগল জুহান তার।  
আঙুলি নেই, দ্বি কাপ বাটি আত আছেতা দুহান তার॥  
বিয়ান ফুয়ার ঔবাকাতে নাগনৌরি বেঙগরে।  
আধার অইলে তার নাঙহান ধরৌরি মি মেঙ করে॥  
কিতা বুলতে কিহানাংত কিহান অরতা হাটন নেই।  
রাতির পরে হবা করে দুয়ারহানি গাটন দেই॥



## ভূগোল

আদিস	আবাবা।
চামফুং	খা বাবা ॥
জংশন	লামডিং।
লুরিনান	সামদিং ॥
আরবিয়া	সৌদি।
লাহুলে	না লৌদি ॥
চেনাই	মুন্সাই।
এলাদের	ডুন্সাই ॥
নামিবিয়া	জাইরে।
খানাদে	তি নাইরে ॥
ব্যাংকক	বেইজিং।
বৈজিতে	হেইচিং ॥
তিরিকুনা	দুধপুর।
মেকুরগ	দুর দুর ॥
মেকসিকো	মসকো।
কাপ এনে	গছকো ॥
কাটাখাল	বেরাবাক।
কামহান	বেরা নাক ॥
চেংকুড়ি	নুয়া লাম।
বিদেশীরে	দেই ডাম ॥
আওয়ালালা	ধলিবিল।
কই নুয়া	ইনচিল ॥
চাংকাপ	মাছুঘাট।
চাকচিরা	এগি বাট ॥
ছয়ারন	লংগর।
বেংকিগ	হংকর ॥
ভূগোলর	য়ারি এতা।
মুখস্থ	করে দেতা ॥
মিতে খানি	ঘুমজিং।
হনলেতা	চুম সিং ॥

## পড়ুয়ার পৌ

পড়ুয়াগই মাতল আয়া - 'হমাদৌরি অজা।  
পড়াহানি না হিকেছু অয়া আহান কজা॥  
ঝানিপপারা বেরইতে মি উয়ালা আগ আয়া।  
নিলগাতা লেরিকহানি কতি নাইলতা সায়া॥  
দিনহান হাবি বিসারেয়াও নাপেইলুগা তারে।  
মি নেয়ইতে কুকুর আগই খাতা দিল ফারে॥  
কওয়া আগই শিলটহানল গেলগাতা ফর দিয়া।  
কতি তারে বিসারলুগা গাছে গাছে গিয়া॥  
ইমাই মাতল - পাঠশালাগৎ নাউ যেইগা আজি।  
বুকেয়া মি মাতে দিতৌ ঘরে অইলে বাজি॥  
বাটলজারে জিরেয়া তি বেলিটিকহান থাকগা।  
নাইলে বিলে মাছ ধরিয়া উয়ালাগ ডাকগা॥  
কাদার শৌগ হবা নেইগ হিকার সাকতি কথা।  
মাতের ঘরে থাইতু উনি দিন এহান খেলবতা॥  
খেলেয়াতে কিহান কানা লেরিক নাচেয়াতে।  
মেয়েকগ মি নাদেহিয়া হমেইতুগা গাতে॥  
এতা বেরাই আহে নারলু - কতদিন ইস্কুলে।  
নাহেছুতা নাগই মিতে থায়া বুলে বুলে॥

## এলা

এলা নাদি হুনা গিরক হারমনিগ বাগতই।  
তোর নুংশি এলা হুনে দাবদিতইক বাঘগই॥  
কওয়া হাবি ঝাঙ লাগিয়া হাকেদে ফরদিয়া।  
মাৎতাইতা পরলেইহান আহিল বার কিয়া॥  
ঘুমর হাদিৎ শৌ কাদানি অকরতাইতা ফামে।  
জীবপকগ নাথাইতাই নাই দেশে ঘরে লামে।  
এতা পারা অজা আগ কিতা মাৎতু তোরে॥  
ভাবক এতা জুগৎ নাছি হারপা ঝানিক করে।

## লারৌ খানা

আফাইসেনার বেয়করে নাউ করেছু মি কিতাও।  
হবাই হবাই মাতলু তারে 'লারৌ এগ দে ইতাও ॥  
কনাক শৌগ, তি খানাতে হবা নেইক অমাটিক।  
সাক্তিহান নাই তোরাং থানা, কইতে মোরাং দে বাটিক ॥  
পেট কামাডতই, অলমি অইতই আকখুলাগই খেইলেতে।  
মিয়াদি তাপ, আহিয়ল অর, আর মানুয়ে চেইলেতে ॥  
সাজৌ বুড়াই লারৌ খেয়া কিতা অছিল জানছ নাই।  
বুড়ি ঔগই আরতি আহান করতেগাহে মানস নাই ॥  
চুলর আগাং জিংতা অইলতা, মরলইছগ ফামহানাং।  
কই দিন তা আছিল নাই ইমে হেজাই ডামহানাং ॥'  
নাদল আরো মাতলু তারে - 'দিয়রগ না নাদরগ।  
ঔহানেহে সাক্তাহানো আধা বুড়া বাদরগ ॥  
কাস কওয়াগ, কিতারকা থাং বুঝ নালরতা গোরুগ।  
জেঠাজেঠির কথা হুনিছ, তি অইলেতাই হুরুগ ॥  
চরগ সায়া নাচেই মোরে, খুচিধরা, হিয়ালগ।  
নিকুলতইতা ইরেইখংলেই, ঔগদে থইছ থিয়ালক ॥  
আর কতিতে হিকেইতু মি উরর শৌগ তোরেতে।  
আকখুলাগই নাহেইছ হুনা ফঙেদে আর চরেদে ॥'  
বুঝেইতে সুপ বুঝ নালইল, অকরলতা কাদানি।  
হারপাছু তার বুধি এতা, মনাছেতা নাদানি ॥  
সিমটেয়া মি কাড়লইলু, হবানেই নাই তা খানা।  
জেঠাজেঠির ঠাক নাথরতা, নাকরেরতা সুপ ঠানা ॥  
মাতলু তারে - 'মারে বেলতু! কাদে কাদে চারতাতে।'  
তিংখুল আগ দিলু ইমে নাকরেছু আরতাতে ॥  
না লালছু চানে ইমা মিতে হবা শৌগ নাই।  
তোর লগেহে দিনহান থাউরি অয়া মি তোর খৌগ নাই ॥  
তিয়ো খানি গালা দিছতা, এসাদে আর নাকরক।  
আকখুলাগই লারৌ খেয়া তারতা মুরে নাধরক ॥

## খাইমুনি

খাইমুনি তিতে উনি নাউ চার লেরিকৌ।  
হৌ খেইতেগা লগে খার উনি খেরিগৌ॥  
দুকগাচে হুৰুমাছে উঠানর আগাগৎ।  
রাধর লংপি দিয়া টুপি আগ বাগাগৎ॥  
লৌদর থৌ থয়া ফারাজিরা খৌগৎ।  
লুরি গটা চারিগল বৌদর নৌগৎ॥  
লালনিতে নাকরর হুকলেগা খঙহান।  
এরা দেনা না মনার ফুংকার সঙহান॥  
বুড়িমার মুড়ি উতা খুড়িরকা কাড়লর।  
তোর গই এতাহাবি আপপানে সারলর॥  
ঘুমজিতে মলগরে দরতা তি জাঙেদে।  
কানা কাম আকহান নেই তোর নাঙেদে॥  
ধান দেইতেগা তিতে নিয়রগা কাতিহান।  
বেলিহান বিসারার অইলে তি রাতিহান॥  
খাঙ দিয়া চাঙ চার পেইলে তি পাঙ শৌ।  
তোর নাঙ জানি উতা লাং লাং শিঙগৌ॥  
গুনাগুনি করতারা মানুহান গাঙেদে।  
তোর যারি দিতারাতা মালঠেপে সাঙেদে॥  
আর হুনা নাকরিছ এতা কাম মাদানে।  
বুড়া বুড়ি বিসারেয়া তি উদাক বাদানে॥

## চৌধুরি

চিনেছ নাই তুমি তারে হৌলেইকেইর চৌধুরি।  
মাতের—মিতে সৌকরারমা গাছজারিবে বৌদুরি॥  
জারর পরে জি লাগেয়া হেদে দৌরি হারপেয়া।  
তপ্তা পানি ডালে দৌরি নামরবাতা জার পেয়া॥  
উরা দৌরি হুতার কান্ধা আকেই হানি করে নাই।  
উতাউ চানে হাবিজারি আছি মবে মবে নাই॥

## পদ্য

পদ্য খানি ইকরলুতা দৌ লিসিঙর বর পেয়া।  
মানু গোরু লুকেইতারা হুনিহান ডরপেয়া॥  
মাতিং হুনিছ খানিক করে, উঠানিহান চালাক নাই।  
ভাংগেয়া মি বুঝা দিতৌ পেলইবেতা কালাক নাই॥  
'কাস কওয়াগই কাঙাবেরি কৌজিয়াগ অছিলতা।  
থলর গাঙে থমক দিয়া থঙিনার ধন থছিলতা॥'  
নিজর গপহান নিজে নাদিং, দেখলে ! মধুর হাবিৎত।  
নুংশি এহান গজে অছে আরতার আবি জাবিৎত॥  
মোরতাতে চা নুঙেইহানে আহের আহির পানিয়ো।  
হংকরিয়া বিতরগ চেই পহন আছে জানিয়ো॥  
'ডাকুলাগই চলন দিতে কু পড়েছে বিহানৌ,  
গঙিয়াগই গঙালাছে হইমা অইতই কিহানৌ॥  
হুতাহানি ডামে থয়া ফুতি আহান অকরো।  
চেমফু আগং চৌল জিঙেয়া চলন দিয়া থকরো॥  
কৌলি করের কঙিয়াংপাই কক্কা চেয়া ডাকছে।  
আধার পক্ষং পূর্ণিমাহান ডাক ডাকেয়া ডাকছে॥'  
অর্থহানতে অতি লুহান ; বু পড়লেতা হবাক?  
নাইলে বার তোরে আরতাই দিতাই আতর সপাক॥  
না উঠিনে খানি বাছা, এবাকাউ লই নাছে নাই।  
পদ্যহানর ঠইগ হারপা লয়ইতেহে আছে নাই॥  
পেট কামাড়ার ! খুল্লই অছে ! কানহান অছে কালুয়া।  
এহানলহে অয়া আছো আজঙাল আলুয়া॥  
হবা যারি বেদর কথা তোমাংতে কানা নেই।  
পদ্য এতার যারি তুমি আর মানুং গানা নেই॥  
মোর মুরগং আছে এতা দিং বুলৌরি ডাহিয়া।  
ফাগিয়েদে নিয়রাইগা হাস্যহানল আহিয়া॥  
নাইলে তোমার মইচগ মাঙর, নিকুলেরতা যত কাম।  
পাকরোনে পদ্য এতা, এতাই অকনে শতনাম॥  
কাম বেলেয়া তোমার সালে ইকরেছু লেরিক কুচ।  
নিয়াম অয়া অছেতা নাই খেরর সাঙগ পারা উচ॥

নাউ হুনেদি জ্ঞা গিরক হাবিতা দিন আহানাৎ।

পাকরিয়া লয়ইতইতা নিয়াম অইলে মাহানাৎ॥

এগদে চা, না বেরইনে, মাতৌরিতা খানি ছন।

না আমিয়েই, কুপ করে তি খালকর এনে এতার গুণ॥

কিতা বুললু! হাই কওয়াগ; 'ক বুলেরতা নুংশিহান।

উলুক ভালুক কইনা আগই আত দ্বহানল বানল ধান॥

উদুর আগই খ-বুলিয়া লৌদিয়া দের ফালহান চা।

তকপা আগই গ বুলিয়া বৌদের উহান তালহান চা॥

ঘ-ল পাকর চনচরাগ, ও-ডাকছে মাদানে।”

শৌর মুরগৎ হমেইবতা কটা কটা কাদানে॥

নুঙেই করে হিকে বেলতাই, হিন নাপেইতাই হারপানি।

কিতা বুলর? তাপ উঠছৎ! অকরলেতা জারপানি॥

মুরগ বুলার, ঘুমৌ আহের, জিঙজিঙারতা দ্বিয়ো জাঙ।

মনহান তি এগদে দে, এতাউ সুন্নর য়ারি থাঙ!॥

সুক আগল ডমক দিতৌ অইলেতে আর বারাদে।

জাঙর পাতা বাগে দিতৌ নুয়ারবেতা পারা দে॥

কিতারকাতে উঠরতা থাঙ! আরাক আহান আনিংক।

এখুরুমতে অঙ্কহানল খানিক করে সানিং ক॥

ওরে যারগা, ধরো ধরো আকগ হনেকুরাগ।

পেইলে মুরগ করে দিলুইছ আগ বুকুরে গুড়াগ।

দৌ

বাহা সপার দৌগি হনো নাদিয়নে তোমার লৌ।

না লাগকনে রাতি নুঙেই আমার গারিং তোমার বৌ॥

কলে সাঙে ঘরে গাঙে না দেহয়েই ছেয়াগ।

থাং না লাগিক আপনাগাছির সান্তা ওতা চেয়াক॥



## য়ারির লগর পরি

দাদার কাতে আদা আছে ইমারকাতে ডিমা কই।  
 মই আহেছে নাবই যাগা দ্বিলপ পারা জিঙা খই ॥  
 জুড়া আহান মুড়া আছিল কুরাং উতা মাঙছে।  
 গতি নেইতা অতিথ এহান, আঙাঙতে নাউ সাঙছে ॥  
 জিয়া জিপুত নেই পিয়াগ লিফাকহানাং ঙাছেগা।  
 নেইপা লকেইর মেইপা আগ খেইপা অয়া আছেগা ॥  
 আবক সিজার কাপক নায়া কিতার পালি করানি।  
 খুলা উগ লেরিক উলা কতিলতে বরানি ॥  
 চুড়ামণি খুড়ার বাপক ধলা বুড়ার অংতা চেই।  
 মানুর মিহান চেইতে বিহান কিহান করে হাটন নেই ॥  
 সালইলিতা মালুইনুতে পালই গাছি ছিড়ানিৎ।  
 জালক উগর মালক উগ সিংতা কথা বিরানিৎ ॥  
 সেনাই থেছে তেনাহানি নেনা মনার মেরাইতে।  
 নীল খানি ঠিলছেতা এতার বেরা চেরাইতে ॥  
 বরর লগে পরর মানু ঘররতাতে নাহেছি।  
 এতাই বার ডাঙর সায়া গাঙরতা না ডাহেছি ॥  
 সুমে খাছি খুম্গ পারা কুম্গ কালা লগরগ।  
 তাঙা লকেইর জাঙাকগ না কিগ আগ থকরগ ॥  
 দামান উগর মামাক আগই নাগই মানু পাছেগা।  
 ঘটগ নেয়া সিঙইতেগা কটগ খেয়াও নাছেগা ॥  
 শরাং আহান করাং গিয়া মরাং পড়লা সাকেইগি।  
 দাপাহানৌ থাপাখালি জবর অছি আকেইগি ॥  
 ঘরে বয়া দিনহান আছে নাছে গোপাল ইসাংগ।  
 থৌপু ঔতাউ দুগর তুল নাগই মান্না মিচাংক ॥  
 আনা আহান কানা নাছে সেবারিগ পাছিগা।  
 চেয়া খেয়া খেঙইতেগা হবাক স খাছিগা ॥  
 রাজার জিপুং পানা অয়া মানা করলা দুয়ারগ।  
 আকগ আছিল বাঘগ পারা ভাবক বারপুয়ারগ ॥  
 তারে চেয়া উঙইলাতা মুঙর উতা খানিতে।  
 মাতের – “কামহান সাম না করি, কইতে ঘটর পানিতে ॥  
 অকরেছ গেটি খেলা, জেঠিমাংরে আংকরো।  
 লাহ্লাদে বাহ্লল নায়ো, তাংখাহানি নাংকরো ॥

জানু এহান মানুর মুণ্ডে কিসাদেতে মাতানি।  
 হারপা দেকা দেহিয়া মোর গীতা কিতা আতানি॥  
 বলী অহুং অজা আজি সলি মলি কিতাউ নেই।  
 মাতে বেলা হাতেক করে মাতেক আহান দিতাউ নেই॥”  
 দলর মানু নেয়া আজি বলর বাপক কলছে।  
 এমাটিকর বেকা এগই মেকা বাতগ অলছে॥  
 হালাক উগই গালারতাতে ডিলইল পালা বরানি।  
 ঔনা নাছি মানু এগই সৌনা সৌনি করানি॥  
 দরা অছে বরাচাউবা আহির পানি ফুটি নেই।  
 এলা এতা হেলা করে লগে প্রেমর ফুটি নেই॥  
 পিছে খেয়া বাজা নেয়া নুঙেই নাছি জাঙেইহান।  
 হনার ছালা দুনা অছে চুনা নায়া আঙেইহান॥  
 দারিৎ বয়া য়ারি দিতে ডাকর বারি অকরলা।  
 লৌ হনিয়া বৌয়েই উতাই তানুর শৌগি খকরলা॥  
 তাঙ বুলতে পাঙগ সায়া লাঙইলেতা কিয়া থাং।  
 মিটে ইমে হজক পিয়া য়ারি দিয়া দিয়া থাং॥

## তেরা কাকচিং

তেরা কাকচিং আগ খইলাং জারে খার।  
 কামাড়ানি মনেয়া তা মইরাঙদারে চার॥  
 লেইসাঙে গুজুরের তুমি তারে মাতে দেই।  
 হিংসাল ঝাঙদেনা পাঙ করে হবা নেই॥

## তেনুয়ার কৌলি

তেনুয়াগই ঔলি জৌলি বাত রাধেছে চৌলি।  
 ঔহানেহে শৌর বাপকে লাগেছেতা কৌলি॥  
 আঠি খেইতে গাঠি লাগিল জিপুত ঘগিরতা নাই।  
 মালক ঔগই বিসারেয়া আনে দিল মানাই॥  
 অতিথ মাহেই আহেছিতা ঘুমজিবাতা ফাম নেই।  
 তানুর এতাং হমানিরতা মোরতা গিরক কাম নেই॥



## দ্বি আক চুটি

পক পাক শকো শকো কাম দুম নাকুরি।  
ডিক ডিক আহিলেতে গুম গুম বাকুরি॥  
সক সক নাকরিনে নুয়া কইনাগ তি।  
কথা নাউ হুরিতা, অছৎক আগ তি॥  
শাংহান গিথানক ডাক ডাক করুরি।  
লে লে নাই জু উহান, উহানেতে মরুরি॥  
থৎ থৎ গারি উগ সদা থাক ভালয়া।  
তারু তারু অয়া থাক বামনিগ মালয়া॥  
ফৌ ফৌ চুলগাছি, দেনে থৌ ফুটিক।  
কিয়াকাতে লামছেতা ইনাফির চুটিগ॥  
সরো সরো নাকরিছ হ্নতেই গালি তি।  
মানু নেই, বক বক খানে বাত ঠালি তি॥  
দিনহান বের বের করিয়া না থাইনে।  
ফচ ফচ দিয়া হিয়া আরগদে নাইনে॥  
ফিং ফিং না সলনিতে সিংহান নেইগ।  
বুজে বেলা ধান এগি আনিয়া হাপেইগ॥  
চিক চিক এ রইদে খুচেইগ কইতে।  
লিক লিক পানি পিক ডকহানে অইতে॥  
খর খর খৌনুগ পানি ফুটি নাপিয়া।  
টেঙ টেঙ করেরতা আঙুলিগ কাপিয়া॥  
এই খেই গম গম, থক থক আহোনে।  
ফাক ফাক না আহিয়ো লেইমারে ডাহোনে॥  
ডিল ডিল কমলাগি বয়া বয়া খেইনে।  
কুৎ কুৎ নাগিলিয়ো আঠি কিতা চেইনে॥  
মজেছে খাটল এগ বেট বেট করিয়া।  
লেক লেক অছে এরে দাতগৌ লরিয়া॥  
হাম হাম করেরতা এগ কার শৌগ।  
খুমা খুমা আত জাঙ বুস্বাই মৌগ॥  
লাংপালে মাটিহান কং কং করেছে।  
চং চং ফালদিতে আমুসেনা পড়েছে॥

ডং ডং নাকরিয় কথাহান গাঙেদে।  
 সর্ সর্ থৌ ফুটি গছে দেই জাঙেদে॥  
 ফিং ফিং সলেছেতা দলাবাউ খুড়াতে।  
 পেন পেন নাকরিয়া এগ খানি জুড়াদে॥  
 থৌ দিয়া লাঠি এগ মের মের করুয়া।  
 কিগ থাং বাহা এগ, বাকাল না বরুয়া॥  
 পড় পড় মুজুরিয়া না ছিড়িনে ডেমগি।  
 নৌ নৌ অছে গাছ, ডেঙগিও নেমগি॥  
 বুক বুক না উস্থলি মকসির চারাগি।  
 না ছিড়ক চেইছ তি হুর্ হুর্ মারাগি।  
 কেং কেং করেরতা বুজন উগ কুংগ।  
 জপ জপ সেদা দিল ধরেছিল চুংগ।  
 গাহালিগি বাংগেদে ফেং ফেং তুলল॥  
 ইমেতে নাগই মাহি মস্তুর গুণল॥  
 তেক তেক ঘাহানাং কিতা তিতে দিলেতা।  
 আগে কিয়া গারিগং নাউ লাগাছিলেতা॥  
 থম থম এ জারতে কিয়াকা না করেছে।  
 জম জম বরনেউ ফল নাউ ধরেছে॥  
 মাজিগং পক এতা বির বির চারতা?।  
 এতা হাবি করতো কিয়া কানা নারতা॥  
 বং বং ধুমা দেই হবা করে খেরল।  
 টিপ টিপ পহরিগ থই এনে বেরল॥  
 গদ গদ করেছেতা শৌগর গারিগ।  
 কাড়লই আতে আছে হুচিগ না বারিগ॥  
 ফল ফল ফালদের চেঙ এগ জিঙাগা।  
 গক গক কাম কর মাঙ ফুতি তিঙাগা॥  
 চপ চপ গারি রম উবা অছে মোরতা।  
 কিয়া থাং কাম এতা খালু জালু অরতা॥  
 নপ নপ করের এ বাঙহান বাগব।  
 হুং হুং না বারেই তোরাং হে লাগব॥  
 ফেং ফেং করেছেতা সলহানে আকয়া।  
 তেরে তেরে নাকরিনে মালকগ সাকয়া॥

পট পট ছিড়ে বেলা গাছেত জিংগা।  
 বাতর গজে মি উতা আগ দুগ দিংগা॥  
 কেক কেক দিয়া এরে আদিগি ফুটাতা।  
 কিতা পানা আনলেতা হাবি অছে হুটাতা॥  
 কতি চানে পেট পেট বাধেছিতা এতারে।  
 জট জট ছিড়ে বেলা মনা খানি দেতারে॥  
 ঙের ঙের করের এ শৌ এগ নেগাতা।  
 ডক ডক আঙারাং বেইনং দেগাতা॥  
 রাউ রাউ পেট এগ কতি বক পাছুতা।  
 বাতগুলি বাছেয়া মি বয়া এরে আছুতা॥  
 গারিগদে হির হির আটেরতা পকগ।  
 বেরয়া না চেই এনে মারে বেলা থকক॥  
 পিচ পিচ বিদারতা কিগ থাঙ জাঙেদে।  
 খানি চানে, বুলানিং নায়েইগা গাঙেদে॥  
 উঙহানে সলহানে ডুক ডুক ঠইগ।  
 হই হই করে করে নাকরিয় গইগ॥  
 কিলু কিলু করতারা মালঠেপে শৌগি।  
 হ্নরতা হাদিরমা দিতারাতা লৌগি॥  
 টেং পাং কররতা ইমে খানি মানিল।  
 নিককা হ্নর তিতে এরে এলা হানিল॥  
 ফট ফট জোনাকর রাতিহান ঙালছে।  
 খরি খরি দাপল চা বুজন আগ সালছে॥  
 চিট চিট বারা বারা ডর দেহা শৌগ।  
 হ্র হ্র যারগাতা হুংগং নৌগ॥  
 চেক মুক নাকরুরি কথাহান মাংতে।  
 কৌলি নালাগি ইচে কই মোর ভাততে॥  
 গম গম কলহানি দারা বেলা সিজা তি।  
 পের করে দিয়া বাত গুলি দেনে হিজা তি॥  
 লেং লেং নাকরিনে তি ক্নাক থতাল।  
 পের পের না পিড়িনে আকহান কথাল॥  
 কাউ কাউ করিরিতা আপপানে যামিনী।  
 যেহানাতো খেঙ খেঙ করেরতা কামিনী॥

মৌরই পিড়েছেতা কানে আগ ঝমকা।  
 নিক নিক নাকরের অজাগর ধমকা॥  
 বুং বুং উরা দিয়া হিল এগি বেলাদে।  
 মনহান নাদি এনে দিনহান খেলাদে॥  
 ডুপ ডাপ লইকর কথাহান এবাকা।  
 ইরা ইরি অছি মানু বারহানি নেকাগা॥  
 লিরি লিরি বৌহান মাদানর পরেদে।  
 পথরির পারে আই, নাথাইনে ঘরেদে॥  
 বেন বেন করেৱতা ধনমাটি এগতে।  
 টপ টপ পড়েৱতা পানি এতা এগদে॥  
 গট গট পানি পিনে গুয়া গাঠি লাগেছে।  
 কালি লছি কলো এগ কিতা অয়া বাগেছে ॥  
 টিং টিং পেট ঔগ খাছৎতা কিতা তি।  
 চেন চেন পিঠিহান আর হুনা জ্বি নাদি॥  
 কির কির ঠেলারতা পানিহান আষাড়ে।  
 এবাকা তি গের গের নাকরিনে বাসারে॥  
 কিং কিং নাজাতেই মিনামপাহানল।  
 জেঠিমাই মোর মুঙে ধান এগি বানল॥  
 হু হু করে লাগেছে এ জ্বি এগ নিবেইনে।  
 কট কট করেৱতা আহি এগ চেইনে॥  
 টেপ টেপ ঘুমহানে বেলারতা তোরেতে।  
 ফুক ফুক পেট এগ খানি করে ধরেদে॥  
 ডুং ডুং করেৱতা নাঙ্গুরি কানেদে।  
 বরেয়া চাং নে মিতে খৌ ফুটি আনেদে॥  
 গুর গুর কিতা বিসারাউরিতা মাৎতা।  
 কের কের নাকরক ধয়া হৌ রাধতা॥  
 খাবা ডাবা অয়া কিয়া করুরিতা কাম তি।  
 পরথেইতারা থাঙো নাউরিতা চাম তি॥  
 তুল তুল করেৱতা শৌ এগ কারগ।  
 কাদের উহানো কতি নুংশিপা নারগ॥  
 জিং জিং জাঙহানি খানি করে সিকদে।  
 গুজয়া নাবই এনে হবা করে ঠিকদে॥

আকপেই গল গল নায়ো, অই কামেদে।  
 ত্রিং ত্রিং কর তিয়ো নাথাইনে ফামেদে॥  
 খিক খিক পানি ফুটি ছিটা দিং ত্বরাক।  
 আহি না জিপেই এনে ইমে গরা গরাক॥  
 ফুৎ ফুৎ না মাঙয়ো আছে কাম কতিয়ো।  
 হাবি আছে কাচা অছে নেয়ছেতা গতিয়ো॥  
 ফরক ফরক অছে চেই নুয়ারাগরে।  
 চিরি বিরি নাকরিয়া আনো মেইপাগরে॥  
 আরতাউ কত আছে, নিংসিং নাউরি।  
 কুনোগই কাম কিতা করে দিলা পাউরি॥

## চিন্তা

না ঘুমজিয়া দিন রাতি মি করৌরিতা চিন্তা  
 হাকহানরে লাককরানি কিতারকা থাং হিনতা॥  
 ছেয়া আগ গজে পড়লে না দুহেয়ার সুপ করে।  
 এতা মিতে বয়া বয়া খালকরুরি কুপ করে॥  
 গাটর পানি এতাই কারে দাপদিতারা ডরেয়া।  
 না মনেয়ো এতা মিতে মাতৌরিতা গড়েয়া॥

## রাস

বাসৌর জিলক সাজ পিদেছে রাস করানির সালে।  
 নাছানিতে নুয়ারিরি ডাকর তালে তালে॥  
 ডাকুলাগ তালকরোনে মেইল দুয়ারগরে।  
 রাসদারিগৌ লুকেইলগা খৌপু উতার ডরে॥



## হুণামানু

হনুমানর জেঠা বেয়ক হুণা মানু সিং।  
আইনে কাদাং জুগৎ করে আক কানাহা দিং॥  
আহি দ্বিগি কিতারকা তোর গিল্লা মালছে।  
নাকগ বার বেকা অয়া কুরাং সালছে॥  
ঠিকানা নেই, আকানা নেই তোর মেইথঙহান।  
ছুনু কালি গছে দিমতা কাদাং খানি আন॥  
এসাদে তি সাকতি অয়া নাহিছ মুঙে মোর।  
বানাপেয়া মাতুরিতা শাতহান হবা কর॥

## টাকগ

বাঘগর গজে আছে টাকগ।  
হবাই উগর মেইচাকগ॥  
আকদিন বয়া বয়া চারতা।  
লেজ্জগল পিঠি খাজুয়ারতা॥  
দ্বি আত দ্বি জাঙ আছে পশুগ।  
তারে চেয়া মিতে ঙাক অছুগ॥  
আস্তিগ খার আক কামড়ে।  
নাইলে তা সুপ নাউ চামর-এ॥  
চাহা পিতে লুসি বাঘ খারতা।  
বেলিটিকে আকগই নারতা॥  
মাদানেদে থার নাই সালয়া।  
বুলেরগা বাবুগ তা মালয়া॥  
ইমেতে মুকসি দিয়া থারগ।  
রাতি নাই তার হংকারগ॥  
না হনিয়া অছু ওয়াইসাংক।  
তারে এ-জনমে উনা নাংক॥



শক্তি সিংহ, নুয়াদিম্নি



কবি ব্রজেন্দ্রকুমার সিংহ গিরকর  
শিশুসাহিত্যর ধারা তিনহানর  
লেরিক তিনোহান অইলতাই  
মেরাক সেরাক, চিংকলেই বার  
ফিরাল। বর্তমান লেরিক এহান  
মেরাক সেরাক ধারার লেরিকহান।  
ছন্দল ইকরেছি আবৃতি করানি  
য়াকরব কবিতার সংকলনহান  
টৌনাটিং।

জ্যোতির্ময় সিংহ